



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 037977 20 Iž**  
**Sarajevo, 22.10.2020.godine**

Sud Bosne i Hercegovine, u vijeću Apelacionog odijeljenja sastavljenom od sudija Vesne Trifunović kao predsjednika vijeća, Srete Crnjaka i Dinke Bešlagić Čovrk kao članova vijeća, odlučujući o žalbi Miodraga Petrovića, Georgstr. 41, 88046 Friedrichshafen, Njemačka, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020.godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 22.10.2020. godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020.godine jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što dostavljena prijava za glasanje izvan BiH nije kompletna.

Protiv ove odluke žalitelj je blagovremeno izjavio žalbu navodeći da dana 31.08.2020. godine uredno prijavio za glasanje van BiH putem pošte, ali da se ne nalazi na spisku Centralne izborne komisije. Ističe da je i na prethodnim izborima takođe glasao sa iste adrese u Njemačkoj, te zahtjeva da mu se izborni materijal pošalje na adresu navedenu u žalbi.

Centralna izborna komisija Bosne i Hercegovine u odgovoru na žalbu navodi da je žalitelj dostavio nekompletnu prijavu, kao i da nije dostavio dokaz o identitetu, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 31.08.2020. godine, pravilno uočila da je obrazac prijave PRP-1 za glasanje izvan BiH na Lokalnim izborima 2020. godine dostavljen na način da je bilo nemoguće utvrditi sadržaj podataka dostavljene prijave. Pored navedenog, žalitelj je takođe propustio dostaviti i dokaz o identitetu.

Postupajući na način opisan u prednje utvrđenom činjeničnom stanju, podnositelj žalbe je postupio suprotno odredbi člana 3.15 stav (1) Izbornog zakona BiH („Službeni glasnik BiH“, broj 23/01 do 31/16), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Centralna izborna komisija BiH je u skladu sa članom 3.15 stav 1. Izbornog zakona BiH odredila rok do 01.09.2020. godine u 24,00 sata za prijem prijave za upis u birača u izvod iz Centralnog biračkog spiska za glasanje izvan BiH za Lokalne izbore 2020. godine. Žalitelj je imao mogućnost da se putem internet stranice i info linije Centralne izborne komisije BiH informiše o statusu njegove prijave koju je poslao 31.08.2020. godine i na taj način otkoloni nedostatak koji se ogleda u činjenici da obrazac prijave PRP-1 nije potpun, odnosno da je dostavljeni samo dijelovi obrasca, a ne čitav obrazac, da bi se mogao utvrditi sadržaj istog.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Vesna Trifunović**